



Maandag, 7 April 2025

‘N BEGROTING VIR INKLUSIEWE GROEI EN ONTWIKKELING

Geagte Mede-Suid-Afrikaners,

Verlede week het die Parlement die fiskale raamwerk en inkomstevoorstelle vir 2025 goedgekeur soos deur die Minister van Finansies in die begrotingsrede ter tafel gelê.

Die 2025-begroting is daarop gerig om die ekonomie te laat groei en die lewensbestaan van ons mense te ondersteun.

Dit is 'n kritieke instrument om ontwikkeling te dryf, armoede uit te roei en ongelykheid te beperk. In 'n tyd van beperkte ekonomiese groei en 'n nou fiskale ruimte moet die begroting voldoende hulpbronne aan aktiwiteite toewys wat inklusiewe groei aanmoedig en die grondslag lê vir volgehoue ekonomiese herstel.

Dit weerspieël die strategiese prioriteite van die regering van nasionale eenheid, naamlik inklusiewe groei en werkskepping, armoedeverligting en die aanpak van die hoë lewenskoste, en die bou van 'n bekwame en etiese ontwikkelingstaat.

Die begroting bevorder die regering se verbintenis om die materiële omstandighede van Suid-Afrikaners op te hef.

Sodra ons skuldterugbetalings uitgeskakel is, is 61% van die besteding oor die volgende drie jaar aan die maatskaplike loon toegewys. Dit sluit die voorsiening van gratis primêre gesondheidsorg, basiese en tersiêre onderwys, en behuising in. Ons het oor die afgelope 24 jaar 'n behoeftigheidsbeleid geïmplementeer waardeur gratis water, elektrisiteit en sanitasiedienste aan huishoudings wat kwalifiseer, voorsien word.

Maatskaplike toelaes, soos kindersorg-, ouderdoms- en gestremdheidstoelaes, is nog 'n instrument vir armoedeverligting. Die waarde van hierdie toelaes sal vanjaar tot bo-inflasie toeneem. Die toelae vir Maatskaplike Noodleniging, wat 'n belangrike rol in armoedeverligting gespeel het, sal ook vir nog 'n jaar verleng word.

Daar sal ook 'n hoër toewysing van befondsing aan klinieke en gemeenskapsgesondheidsentrums wees as deel van die verbetering van toegang tot gesondheidsorg. Ons belê daarin om gesondheidspersoneel, veral dokters en verpleegsters, te werf en te behou en om nuutgekwalifiseerde dokters na afloop van hul gemeenskapsdiens in diens te neem.

Die begroting wys aansienlike fondse toe aan ander eerstelyndienste soos onderwysers, polisie, noodpersoneel en die Grensbestuursowerheid.

Die verbetering van opvoedkundige uitkomst is die sleutel tot gemeenskapsopheffing, -ontwikkeling en die kweek van die vaardighede wat ons ekonomie nodig het. Begrotingstoewysings is gemaak om onderwysersopleiding te ondersteun vir uitgebreide moedertaalgebaseerde tweetalige onderwys en vir vroeë leesprogramme. Daar is vanjaar 'n aansienlike belegging in vroeë kinderontwikkeling wat ons verbintenis tot die vestiging van 'n stewige grondslag vir die ontwikkeling van elke kind weerspieël.

Bykomende fondse is toegewys aan openbare indiensnemingsprogramme wat 'n belangrike rol in die voorsiening van werkseleenthede speel in 'n tyd waarin ekonomiese groei beperk is.

Om entrepreneurskap aan te moedig is fondse beskikbaar gestel om kleinsakeondernemings te ondersteun. Om ondernemings verder aan te spoor om meer jongmense in diens te neem, word aanpassings aan die indiensnemingsbelastingaansporing gemaak.

Suid-Afrika se besteding aan die maatskaplike loon kan slegs volgehou word indien daar hoër vlakke van ekonomiese groei is. Die begroting wys aansienlike hulpbronne toe om infrastruktuurontwikkeling aan te

moedig wat groei en werkskepping dryf.

Alles in ag genome sal tot R1 biljoen oor die mediumtermyn aan infrastruktuur bestee word. Dit sluit in die toewysing in hierdie begroting van 'n bykomende R62 miljard oor die volgende drie jaar vir die instandhouding van paaie, elektrisiteitstransmissielyne, water- en sanitasieprojekte, skoolinfrastruktuur en om die deurlopende herstel van ons spoornetwerke te ondersteun.

Steun word ook oor die mediumtermyn verskaf aan ander maatreëls wat groei versterk. Dit sluit in aansporingsprogramme in die motorbedryf, die uitbesteding van sakeprosesse, spesiale ekonomiese sones, die produksie van elektriese voertuie, die klere- en tekstielbedryf en ander sektore.

Die 2025-begroting maak aanpassings aan die toewysings aan munisipaliteite om hulle in staat te stel om aan hul infrastruktuurbehoefte te voldoen, dienslewering te verbeter en hul inkomste-invorderingstelsels te verbeter.

In 'n uitdagende ekonomiese omgewing – beide plaaslik en wêreldwyd – ondersteun vanjaar se begroting maatreëls om groei te dryf en die uitwerking van armoede te verlig. Terselfdertyd het dit ten doel om staatsfinansies te stabiliseer en voort te gaan om ons nasionale skuld te verminder.

Die begroting weerspieël die prioriteite van die regering se mediumtermyn-ontwikkelingsplan, 'n aksieprogram van vyf jaar wat vinnige, inklusiewe groei prioritiseer, 'n meer regverdige samelewing skep en staatsvermoë bou.

In 'n tyd waarin ons enkelvoudige fokus die Suid-Afrikaanse mense moet wees, moet ons die beperkte hulpbronne wat ons het, gebruik om saam te werk vir die gemeenskaplike belang.

Vriendelike groete,

Cyril Ramaphosa



SHARE



Copyright © 2025 The Presidency, All rights reserved.

Our mailing address is:
The Presidency
Union Buildings | Government Avenue
Tshwane | 2001 | South Africa